

# «L'intunaziun dal sex perfetg»

Gulliver preschenta la sonda il nov disc cumpact «Lalala»

DA CLAU DERMONT / ANR

■ **La band «Unused Pawnshop» ha edius discs cumpacts, uss ha ella midà num e stil – «Gulliver» da Cuira preschenta tuns nunusitads, nunenconuschents. Ils sis giuven da Cuira èn cuntents cun lur svilup e las midadas.**

A la fin dals onns novanta è la scena da punkrock e ska naschida a Cuira en las catacombas dal «Safari Beat Club» e l'emprima band antecessura da «Gulliver» che sa numnava «Sly Fox» è vegnida fundada. Già tschintg dals sis musicchers d'ozendi sunavan en questa band. Cù il sisavel, il batterist *Simon Jäger*, è vegnì vieters l'onn 2001 ha la gruppa surpiglià il num «Unused Pawnshop». Dapi lu sa preschentan ils musicchers comunablamain. L'onn 2003 èn els sa rendids en il studio per registrar l'emprim disc cumpact «Burning City», cun il qual els èn era sa rendids sur ils cunfins da la citad. Els han concertà en l'entira Svizra tudestga.

## L'emprim pass vers Gulliver

Il segund disc «Doctor Time» ha già gi pli paucs elements da ska, il stil da la band ha survegnì dapli elements da rock. Quel album ha pussibilità a Unused Pawnshop da sunar a radund 30 concerts da la «Etnies Fast Forward Tour 2006» en l'entira Svizra. Il toc «Gulliver» sin quest disc cumpact è ultra da quai stà il mussavia per il svilup dal stil da musica che la band ha fatg suentar.

Sco il ghitarrist *Curdin Cantieni* di è il num «Unused Pawnshop» per els betg pli contemporan. «Quai è ina cumposi-

ziun cun agid dal dicziunari dal temp cun nus essan stads 15 fin 19 onns», di el. Sumegliant saja lur relaziun cun las chanzuns da Unused Pawnshop. I na saja betg ch'els quitan tuttenina schlet lur chanzuns, ma ellas na correspundian betg pli a lur fasa da la vita. «Nus vulevan far fin cun quel punkrock postpubertar.» Sco el di haja la musica ch'els tedlan segir influenzà els fermamain. Tgi exact e sco tgi ch'els tunan na vul *Curdin Cantieni* dentant betg numnar.

## Midà instruments

La band Gulliver, pli baud Unused Pawnshop, sa cumpona sper il ghitarrist *Curdin Cantieni* dad *Adrian Glatthorn* (ghitarra, chant), *Simon Jäger* (batteria,

chant), *Nando Bächler* (bass), *Simon Bonorand* (piano) e *Jan Barandun* (mpc). Fertant che gitarra, bass e batteria èn restads èn ils instruments da flad saxofon e trumbetta svanids, els èn vegnids remplazzads cun pli bler piano e synthesizer. «Quest svilup ha salvà nus da la farmada», menziunescha *Curdin Cantieni*. La nova instrumentaziun saja era la consequenza da la nova moda da cumposiziun sin il computer. *Simon Jäger* ha en pliras chanzuns surpiglià il chant. Cun il pensum dubel vegnia i pretendì avunda dal fitg talentà *Simon Jäger*, manaja *Curdin Cantieni*.

Lemuel Gulliver, la figura d'istorgia da Jonathan Swift, ha dà il num per la chanzun e suentar per la band. Per la

band è Gulliver l'uffant en l'um, la naitad dal scheni. U simplamain: «Lalala».

## Lalala

Il nov disc cumpact cun il num «Lalala» è vegnì registrà a Koblenz en Germania en il Studio 45 cun agid da l'enconuschent producent *Kurt Ebelhäuser*, che ha già lavurà per grondezzas sco «Donots» u «Rammstein». Produziuns en il Studio 45 èn fitg charas u fitg difficilas da survegnir. *Simon Jäger* e *Jan Barandun* han fatg il lung viadi fin a Koblenz per sa preschentar persunalmain tar *Kurt Ebelhäuser* e sunar intgins tocs. «Ch'els dus èn viaggiads da la Svizra fin tar el ha para impressiunà el», di *Curdin Cantieni*. Las chanzuns da demo sajan era stadas fitg «crazy», quai haja stuì plachair ad *Ebelhäuser*. Quel ha fatg ina offerta speziala per Gulliver, uschia ch'els èn sa rendids a Koblenz per registrar lur musica. Quella è grev da descriver: «Tuns armonics fragils contrasteschan cun imposants tuns da bass, lingias da chant per part melancolicas van a prà sorprendentamain cun metrums per part spèrs. Pia la pura intunaziun dal sex perfetg!», emprova *Curdin Cantieni* da declerar.

Il nov disc cumpact, che cumpara tar il label independent 08eins dal Grischun, vegn battegià la sonda a Cuira en la Werkstatt. Suentar sa preschentan ils tuns da Gulliver da Turitg fin Basilea.

**Batten dal disc a Cuira, Werkstatt sonda, 29 da mars 2008 21.00 cassa da la saira 18.–**  
[www.gullivermusic.com](http://www.gullivermusic.com)



**Enconuschents musicists, nov num: Simon Jäger, Simon Bonorand, Jan Barandun, Adrian Glatthorn, Curdin Cantieni e Nando Bächler èn Gulliver.**